



VROEG-OGGEND-KOFFIE-SAAM-MET-GOD



19 Oktober 2018

“Hoe om die stem van God duidelik te hoor”

Lees Eksodus 3:1-6 rustig deur en reflekteer oor die woorde wat daarin staan:

¹ Moses het die kleinvee van sy skoonpa Jetro, 'n priester van Midian, opgepas. Hy het die kleinvee diep die woestyn in gejaag totdat hy by Horeb, die berg van God, gekom het. ² Toe verskyn die Engel van die Here aan hom in 'n vlam binne-in 'n doringbos. Terwyl hy kyk, sien hy dat die doringbos aanhou brand, maar nie uitbrand nie. ³ En Moses sê vir homself: “Ek wil tog 'n bietjie nader gaan om hierdie wonderlike verskynsel te bekyk. Waarom brand die doringbos dan nie uit nie?” ⁴ Toe die Here sien dat hy nader kom om te kyk, roep God na hom uit die doringbos: “Moses! Moses!” En hy antwoord: “Hier is ek.” ⁵ Die Here sê toe vir hom: “Moenie nóg nader kom nie. Trek uit jou skoene, want die plek waarop jy staan, is gewyde grond.” ⁶ Verder sê Hy: “Ek is die God van jou voorvaders, die God van Abraham, die God van Isak, die God van Jakob.” Toe maak Moses sy gesig toe, want hy was bang om na God te kyk.

Wat moet ons hoor?

In hierdie gedeelte sien ons hoe God duidelik en direk met Moses gepraat het. Vandag weet ons die Here praat nie meer op so 'n manier met mense nie en dat Hy deur ander maniere met sy kinders praat. God praat met Sy kinders deur die Bybel, deur die natuur en deur stiltes. Hoeveel van God se stem hoor ons vandag met al die geraas wat om ons aangaan? As jy vandag God se stem wil hoor en wil onderskei of dit waarlik Hy is wat met jou praat, leer 'n paar dinge uit die verhaal van Moses. 1. God praat altyd direk met Sy kinders. 2. As God met jou praat sal jy weet dit is Hy wat met jou praat want die grootheid van Sy teenwoordigheid sal jou oorval. 3. Wanneer God met jou praat sal dit altyd in die vorm van 'n opdrag, 'n vertroostende boodskap of direk in lyn wees met wat in die Woord van God staan. God sal nooit teen Sy Woord met jou praat nie! Neem 'n tyd om te hoor wat God vir jou sê en reageer op Sy stem soos Moses gedoen het in Eksodus 3.

Wat wil die Here vandag vir jou sê? Raak stil en luister aandagtig. Laat toe dat jou gedagtes gevul word met Sy teenwoordigheid en luister vir 'n stem of 'n skrifgedeelte. Gaan reflekteer daarvoor en soek bevestiging in die Woord van God. Bid nou dat jy sal doen wat God van jou vra.

Gebed: Here, help my om te doen wat U vandag vir my vra. Help my om sensitief te wees vir U stem en help my om te onderskei wat U opdragte vir my lewe is...

Hoe kan jy weet of die Here met jou praat deur iemand anders vandag? Dink bietjie aan 'n woord of 'n profesie wat iemand al vir jou gegee het en vra jousef bietjie die vraag af of dit God was wat met jou gepraat het en of dit iemand anders se interpretasie van jou omstandighede was.

Ons moet baie versigtig wees om nie alles wat ander mense sê te vat asof dit van God af kom nie. Ons moet by God self gaan hoor wat Hy vir ons sê en dit wat ons gekry het van ander, gaan toets aan dit wat in die Bybel staan. Daar is baie valse profete daar buite en as ons nie leer om SELF by God te hoor wat Hy vir ons sê nie, mag ons dalk verlei word om die verkeerde dinge te doen.

Gebed: Here, help my om te onderskei tussen die stem van die mens en die stem van U Gees. Help my om sensitief te wees vir alles wat U vir my wil sê en help my om altyd te doen wat U van my vra...

Wat maak jy as jy die stem van God gehoor het? Dink aan die verhaal van Moses. Tree jy met disrespek op as God met jou praat? Hou jy jou skoene aan (op 'n metaforiese manier) of hanteer jy die stem van die Here met ontsag? As God vandag met jou praat moenie sy stem ligtelik neem nie. Dink oor die woorde en wees getrou aan dit wat jy hoor.

Gebed: Here, my oë en my ore is twee van die grootste struikelblokke om duidelik U wil vir my lewe te bepaal. Ek luister so gou na ander mense en soek so gou na tekens. Help my vandag om stil te raak by U en help my om U wil vir my lewe te gaan leef...

Ons bid vandag vir die volgende persone:

Hannalie van Zyl (kanker); Paul Menge (gesondheid); Susan Niemann (gesondheid); Johann Steyn (kanker het hervat); Dini Pretorius (gesondheid); Cobus Louw (gesondheid); Ria Welgemoed (kanker); Marietjie de Beer (gesondheid); Trudi Leonard (gesondheid); Deon Human (gesondheid); Lidia Human (herstel na bestraling); Ettian Britz (gesondheid); Petro Pike (gesondheid); Diane Scheepers (herstel na operasie); Ronnie de Lange; Estelle Lunderstead; Tonia Antonissen; Kapok Botha (bisepe geskeer)

Die volgende sake lê ons voor die Here neer:

Ons sê dankie dat die Here gedurende die week die evangelie laat versprei het in en rondom die dorp; Die Ring van Kroonstad; Die werksaamhede tussen gemeentes; Die komende somer en die voorsiening van reën; Besighede en besigheidsmanne in Kroonstad; Die boere in ons gemeente en gemeenskap; Die NG Kerk in Suid-Afrika; Dat God se koninkryk spoedig moet kom; Leraar en sy gesin; Die verspreiding van die evangelie; Sendelinge wat die woord verkondig; Ons land en sy leiers; Die grondhervormingskwessie; Armoede in ons land; Alle ander sake...

“Luister meer en praat minder”